


濟寧直隸州續志

鄧際昌





濟寧直隸州續志卷之十四

孝義總傳

人心之厚薄風俗之隆替胥先於門內覘之以次推及於鄉黨朋友焉自風俗不古孝敬無聞蔑禮犯上往往而有而所謂睦婣任卹之義無論矣猶幸有能敦內行篤高誼以維持名教於不敝者是在昔爲庸德之常今幾幾乎爲僅存之碩果焉錄而存之或有裨於世道云云

王昭鑑字鏡源世業賈昭鑑幼嗜讀每至深夜母禁之則俟母眠後潛起讀弱冠補博士弟子員旋以優等食廩餼其父遠出不歸昭鑑念之輒啜泣嚴冬典衣得微貲乃北至天津等處徧覓之既久不可得復折而南往來江淮穎毫間一日邂逅於丹陽肆得之涕泣奉歸因長途跋

涉饑寒困頓得咯血疾遂卒年三十二歲臨終自歎曰愧無顏子之德
乃符顏子之壽聞者悲之後有上其事者旌如例祀孝弟祠妻史氏殉
詳列女傳

朱壽祺字仁宇幼孤事母孝患乳岩壽祺稽顙北辰願以身代終其身
不如葦析箸時倍給於弟怡怡如也晚年好吟詠著有松溪詩稿若干
卷

楊志存奎文閣典籍甫周歲母李氏卒依繼母聶氏十一歲聶氏又卒
後依繼母崔氏崔性嚴每遇事輒鞭笞之志存晏如也及成立其父多
病志存日夜侍雖家貧甘旨無缺父歿哀毀號泣兩日瞽年餘日復明
人咸謂其篤孝所致嗣與弟六人析爨以家產盡分給諸弟曰若輩年
幼不能生子尚可自食其力無慮其友愛如此

周翰溪字少樞父夢熊字渭臣諸生鄉里稱善士翰溪四歲失恃又多病賴繼母楊氏撫育調護之與其弟翰池同入州庠保送鴻臚寺序班以繼母年老多病乞終養既母患痢親侍湯藥衣不解帶母卒不瘳翰溪哭母憂鬱成疾疾亟時猶呼母不迭歿後公籲請旌入祀孝弟祠

劉增字益齋太學生兆恩子母閔氏早卒增撫於繼母仲仲性嚴有小過呵斥不少貸增曲意承受家計雖窘甘旨無少缺既家益落黃遂業醫因得資以養母易箒時語不及私惟屬其子廣鈺善事祖母焉里人欽其孝公籲請旌入祀孝弟祠

張道瑞字獻符性孝友母况氏病篤道瑞割股和藥以進愈弟道吉卒哭泣不止者數年次弟道藝好施予每大比送寒士試卷親友困乏周卹如不及母族妻族及女兄弟家歲有補助丁中丞寶楨以孝友上聞

入祀孝弟祠

戴德裕字容生母晚年多病晝夜侍側病篤德裕割臂三次和藥以進里人爲之請旌入祀孝弟祠

王炳寰字輝宇事母孝母患喉勢垂危炳寰割膚肉和藥奉母母疾瘳越三載母又病復割膚肉以療之竟不復效旣屢欲以身殉夢父母以生順死安訟之其心乃少戢然自是不茹葷不衣裘不入寢室不作富貴功名想朝夕不離墓側護守林木三十年如一日年五十六卒同時有魏廷瑞字聖符幼失怙事母孝母病割股母故亦以廬墓聞均旌如例張秀田字倬甫同治元年捻匪北竄村人盡逃秀田以親老未及避賊且至其父促之行曰去去勿以老身罹不測禍秀田卒不忍去仍侍父側賊至秀田曰生惟命殺惟命財物恣取之亦惟命惟乞勿驚吾老

父賊曰孝子也遂相率去

周貞元字金堂河標中營副將咸同間率兵勦賊忘身爲國矢傷右臂猶大呼殺賊不迭河帥以良將獎之貞元幼失怙恃賴叔父母撫育之厥後叔父母無子貞元遂兼祧焉奉養以禮能得歡心親有疾露禱剖肉和藥進病卽瘳古所謂求忠臣必於孝子之門良不虛也

劉殿仁母張氏疾危殿仁思割股以進適爲其父所見遂中止而母疾亦瘳家貧性至孝恐娶妻反爲累因鰥居終身年七十鄉人憫其孝而無後焉因爲選其從姪惠麟爲嗣爲之謀家室上其事於有司州牧李嘉其孝捐廉三千助其奉養之資并爲之請旌焉

孟咸明字希哲性孝友母病百藥罔效希哲焚香籲天乞以身代潛割股和藥以進母飲之尋愈州人欲旌之固辭鍾寶立孝廉金鄉周伯蔭

海寧二山志卷之六 年一四
俱作贊美之子際昌諸生

王鴻倫字敍庭例貢生奎文閣典籍蚤失怙恃隨兄鴻磐就鞠於季父增墉時墉有一子童殤卽以倫爲嗣倫事親孝依依膝下時作孺子孝啼滌瀧旨甘必親奉之母年逾七旬時患痰喘倫焚香告天願以身代比母疾危倫於料量湯藥時袖藏匕首欲割其股適其父過斥之遂止而母病頓瘳鄉人上其事於有司州牧王題孝弟可風四字旌其門并以上聞得旌表如例

王癡兒生寒苦性憨癡因以癡兒呼之父早歿家赤貧痴兒日以行乞所得易甘旨以奉母自食乾糗粗糲歷數十年如一日迨母以天年終痴兒日夜號哭月餘亦卒里人欽其孝爲醵金埋葬焉

汪業芝以孝聞其子傳隆事母孝母病日夜祈禱母歿哀毀卒同時有

廩貢生李銘恩巡檢沈維垣程德麟韓銘桂王鼎臣白爲屏侯鳳楷楊炳麟均以割股旌王鳳岐張樹勛亦以孝聞李春溪張連元蔡世昌岳覲恩均割股療母疾疾頓愈里人以孝舉州牧題額旌其門

呂時功字勵亭少爲州吏員嘉慶十八年歲大饑上發賑銀有司奉行不力賴時功力爭黎庶咸沾實惠賑竣卽堅辭家居焉生平精岐黃善繪蘭石有友洪亮貧時功日畫一幀俾購之以謀食宗族戚友困乏恤之恐不及家中落不計也子大彬字文甫咸豐年捻匪竄亂彬日輸錢雇義勇守土圩經兩月未稍弛鄉里德之

王延桂字秋巖恩貢生少孤貧事母劉孝以修脯所入供甘旨姊適閭貧不能炊每致餽以爲常後有得於老氏止足之說益致力於義舉有富室子家中落壯無以娶女家迫離婚窘謀之桂桂閱焉爲假館措貲

委曲成其事娶逾年舉一子越三年其妻死後富室子某曰雙瞽卒賴此子以免凍餒焉喜鈔書焚膏繼晷日萬數千言工詩古文辭著有古竹軒吟稿味蔗軒文集

倪復謙字蘭亭諸生性慷慨有豪俠氣遇公事輒攘臂先爭漕米定價其尤著者匪亂時其母爲賊所殺謙誓欲復仇力合百餘莊結連莊會擁衆以張其勢賊謀知遁去俄以公義觸當途拘之將刑幸有人力解脫同治十二年卒州人林之鵬爲義士傳

祝錫廷德行弟光緒十八九年間泗堤由郭莊冲决修堤無資錫廷慨捐鉅款三千餘貫而堤工始得以竣事鄉民賴以免患及卒人皆惜之夏元善字百祥世襲雲騎尉居城北壺上性好施歲凶荒輒分糧於鄉里同治季年黃河决口官令出夫築隄值歲歉附近兩村多貧民元善

獨出工料費欸數百千時議他日歸還嗣後無還者元善亦不過問其忠厚類如此

唐繼元性仁厚狷介自守拾遺金偵知其人爲葬母養父資還之其人泥首謝曰儻非君吾母固無以葬吾父子之命俱不保吾雖無以報大德天終相之感泣而去子廣居諸生

周培增字壽山光元年舊泗河興工培增上堅築泗隄免衝運隄一策時論偉之

楊萬順一名金萬南貫集灌塚村人世耕讀其父柱嗣伯祖捐職州同鳳陸爲子母李氏勅褒節孝萬順七歲失怙哀毀如成人稍長明大義嗣祖晚年育一子善事之能得祖父母歡同治六年任逆北竄突至灌村萬順方在塾聞警急回家奉祖父母入圩避難至其家中人已俱逃

聞其祖被擄捻逆勒償取贖萬順遍哀親友荒村乏金銀無所措惟村人高機有一馬甚駿憐其孝而予之萬順牽馬往村人阻之萬順志不可奪詎賊受其馬釋其祖而留萬順更索重資不得遂俘萬順去逼使焚掠萬順堅不肯從至甯陽境遇害有同被脅者日擊其事後逃歸告諸其家家人尋至其處屍已潰爛而文契尙在腰橐中遂將骸骨歸而葬之時年有二十有二云

杜石渠字經涵同治十二年舉人諸城縣訓導父煥彩性慈善每欲籌款爲地方善舉以力薄未果石渠秉承遺訓銖積寸累捐款助漁山書院膏火及棲流所歲修其後又捐貲生息爲文廟歲修暨賓興義學備荒贍族之用由東撫奏請奉旨給杜煥彩樂善好施匾額子慶琳諸生陝西甯羌州州同

李塋字德厚蚤失恃繼母來歸時塋方習商業每日歸事炊白以代勞或得食與否卽逕往肆中未嘗有怨言比長時以甘旨奉其母昏定晨省數十年無倦容繼母感其孺慕之誠善視之逾於所生母時有疾塋焚香露禱病愈始已塋或有事遲歸母必俟其歸方就寢其後塋先母卒母哭之慟曰天喪吾孝子矣子青雲諸生

楊士本字道源附貢生候選訓導事母孝弟士鎔早卒遺子四女三士本教育婚嫁無殊已子臨終遺命子宗麟均析其財產時論稱之

潘守序字仲泉矩從次子幼聰穎從父讀日誦數千言甫冠以解經受知於錢塘汪學使鳴鑾拔入州庠深器之丁父艱旋哀毀卒

孫聯槐字蔭三庠生春泰之猶子也父春皋道光十五年舉人聯槐幼失怙長能讀書承父業事孀母孝女兄適吳貧寡無依迎養於家撫孤

成立鄉黨稱孝友焉人皆謂春臯有子云

孫聯瑞字星五號蓉坡廩膳生性孝友丁父艱遂杜門不出願母以終身粵匪之亂協辦團練肅清後保訓導加五品銜以母老不樂仕仍居鄉里任地方事如修文廟疏洸河建文昌閣其最著者晚年習靜好潔作古文以自娛年七十五卒子遵賢諸生鴻臚寺序班有父風

李慶棋字壽甫光緒二年舉人性友愛能養志所交皆知名士且有知人鑒與弟晉祺均有名當時丁父艱哀毀骨立喪葬盡禮卒以功名偃蹇鬱鬱而歿卒年僅五十有三妻王氏曾割股療母疾妾鍾氏殉妻孝妾烈事詳烈女傳弟晉祺字純甫廩貢生德平縣教諭一時有郊祁之

目云

冊采訪

李葆真號山農壬子恩貢生尙志節尤以孝友聞常侍父疾盛暑無袒

楊父歿事母無暫離手調甘旨與弟析居後貨財不私異味必招與共食學期明道從游者以百數端嚴之氣消人逸志歲凶日不舉火講課泰然也癸丑歲里出兵車殫力集義首衆辦理甲寅三月聞逆賊渡河不勝髮指嘔血不止卒年六十有五

以上錄縣志
以下金鄉

李聚斐字澳園庠生性孝友父歿哀毀踰恒母病博攷方書爲治療因通歧黃術施刀圭捨葯餌活人無算與弟凝斐友愛彌篤兩姊家貧以時按濟生平無疾言遽色與鄉人交一以和處之卒年七十有五鄉人稱孝和先生

趙朝珍家貧性至孝爲傭得錢輒市甘旨以奉親不爲生產計冬月父思魚解衣敲冰泅水求之果得魚夜侍父寢雖嚴冬凜冽呼之必起數十年如一日父爲之謀婚力拒之卒不娶父壽九十九歲卒朝珍已七

旬猶朝夕攀號爲孺子泣云

戴銘誥庠生弟維誥同居無間言事父士俊以孝聞父年老痿痺兄弟不離臥側衣不解帶者九年每飯兄弟侍饌必另一几子孫自八歲以上者悉令羅食圍坐以博親歡家雖清貧然天倫樂序人到於今稱之誥晚年刀圭濟世有和緩之目維誥畎畝終老歿世三十餘載鄉人矜式弗忘宣統三年鄉人額其門曰孝友一堂

韓廣志家貧傭力爲活所居茆屋一夕弗戒於火廣志踉蹌走尋知其父尙在室內乃濡綿被裹其父出父得免廣志火灼焦爛數日死里人曰爲孝子

胡會逢農家子事繼母孝兩兄皆有室季弟幼爲繼母出父歿遺田六畝兩兄計家貧各携妻子自謀衣食田產悉以奉母會逢私計曰兩兄

出猶之可也吾再出母與弟疇依乃從繼母鞠少弟數年後小有贏餘
爲弟婚娶代母中饋或問胡不自爲計曰貧難兩全弟有子何患葬我
無人終不娶

戴瑞雪乳名鐵頭有至性一日母暴病氣絕瑞雪焚香跪中庭籲天求
代旣而母甦跪投母懷宛轉號呼乳兒不啻也邑人周磊親覩其狀作
戴孝子歌其歌曰鐵頭喪母天喪鐵頭母有鐵頭母且母憂搶地呼天
兒願代母無母無鐵頭母去兒留兒心苦兒弟妹將誰撫兒死母存一
家春溫兒弟教兒兒光大兒門兒死安足論泣嗶嗶聲琅琅雲漠漠天
蒼蒼天不聳聳應鑒兒衷腸哭聲未絕燭回光羣呼母甦鐵頭勿自戕
鐵頭匍匐膝行撫母牀母醒母應兒喚曰雙張一語未應涕泗滂兒不
復生兒去訴冥王鐵頭罪深於母乎何尤於母乎何傷再蹶再起步趨

跟踉回頭抱母泉路同行母曰嘻兒勿啼兒啼母悲鐵頭拭淚索兒衣
蒼皇跪應曰唯唯兒有母在死何爲噫嘻吁兒有母在死何爲鄉人傳
誦之

劉某業屠葛村集人軼其名事母孝飲食未嘗缺肥甘一日母病欲延
醫士衷與興華診視醫士辭不肯往旋他出屠要於路醫士恐怖隨至
其家屠者率家人環拜供饌豐腴敬禮備至醫士給藥數劑病果愈屠
者喜極率家人環拜如初醫士曰吾一生受人延聘多矣特別無禮未
有如君者然事母之孝待醫之恭亦未有如君者知前此要吾於路爲
孝心所激發迫於不容已者也吾肉眼不識孝子愧甚愧甚從此與屠
者相交甚懽異日屠者宰全豕負以往表示謝忱云

李薰字解人恩貢生父作舟倡明正學精研洛閩之緒一時名流雍雍

出門下薰秉庭訓汎濫經籍久之而得其學之所在一門之內道脈繫焉生平篤內行六歲失恃哀泣動左右後遭喪幾滅天性大父泣慰之始進飲食治喪一遵文公家禮事大父及繼母以孝聞厚裝嫁異母妹更周恤其魏氏姑終身不衰卒年七十有三

高金城字翰卿元驃騎上將軍總帥顯後性至孝年六十餘繼母患瘡飲食湯藥必躬奉從未假手他人其敦內行如此晚年食用缺乏輒閉門者累日鄉里重其行爭迎至其家以供飲食卒年八十有五

張化一字鏡圍號鐵山庠生生至聖廟樂學官幼有至性十歲時母思單邑燒餅翌日即託言探親赴單購歸以奉母嘗念母不喜食肉每逢朔望市豬肉分貽鄉里六十以上者爲母祈福閱二年母乃食肉焉後因母春秋高置一簿題曰萱堂飲食錄上書年月日時記每飯某物多

寡且注意忻感數年來無一時間闕無一字草簡母歿三年不入私室一飯更書一簿曰靈前供獻錄其詳慎與飲食錄等又以民不興孝由無所感發遂破重貨刊孝經專本餉世邑人李人驥聞而異之以孝行足風旌其門

孫甞字生生庠生性孤介嚴厲寡言笑慎交遊篤行孝友尤嚴於居喪悲哀蔬食三年不輟每讀先人遺書輒三復流涕教人以立德植品爲先親族交遊間有過失皆面相規戒或吟詩託爲諷諭人皆化之

李右瑾世業儒與兄達石魯石友愛時稱金友玉昆兩兄先後補博士弟子員右瑾援例入國子監樂施予咸豐年捻匪不時騷擾衆議築砦柵而歛不充右瑾慨然折家貲之半助之用是砦工以竣得完守

張不智敦氣誼能急人之急同里袁士欽罹冤獄未由昭雪欲上訴苦

無資貸於不智不智惟所需既袁氏無以償將田數十畝立券徐不智抵前債不智不受強委之迨士欽訟得直返不智還券於士欽曰鄉里周急義也乘急折產末俗之漓耳卒歸之士欽感且泣屬子孫勿忘所賜

戴用中字朝萬樂施予遇惇獨無告婚葬不舉者推解如弗及橋梁道塗不治者量力修舉或獨任之乾隆中重修磚城捐白金二千兩助之平生好義多類此嘉慶七年用中歿且期知縣譚文謨下車採風旌其門曰樂爲好施時稱戴善人家

畢九如年五旬無子納妾某氏往索焉有黃氏女端而麗叩其價百緡九如詢知爲宦門女卽日送歸故里不索值而還後妻生子孫某爲武舉人子姓繁昌以爲還女之報云

徐虛已性孝友年十四丁父憂哀毀如成人既葬田產多賣以償夙負家益窘乃早晚與傭奴同操作中年稍稍裕鄰里有急難輒賙之咸豐年淮匪熾虛已卽村築寨工未畢而賊兵集寨失守虛已已溷入賊營危甚賊中有夙感其德者讓以所乘之馬虛已駭聘其人曰君不識關東某也耶比及夜有人導虛已出賊營贈以餅餌充腹急使去曰吾亦銜舊恩者遂脫於厄行路者指爲徐善人家

石岱峰性淡泊居恒四壁蕭然然友朋至輒署酒縱談古今不稍倦咸豐三年歲歉欲遠出貨糧三升留與家人食行數里忽心痛曰吾家生吾弟死矣急返喚弟至均分之晚年德益進鄰里有爭岱峯至數言立解靡不悅服

胡秉禮咸豐十二年副貢以教諭改署四氏學教授尙廉潔任滿解組

歸鄉里設帳授經多所成就家故饒樂施予外姪李奉典鰥居秉禮助資令續娶既生子夫婦早逝遺一孤秉禮爲覓乳媪養之以至於成立南匪有警家屬倉猝避入城車駕聞鄰村戴鶴敏他出家屬尙未行急卸裝馳赴戴氏其急人之難類如此卒年七十有二

蘇世福字錫五有孝行慷慨好義有某氏子爲匪所攀誣邑宰逮捕拷掠備至世福毅然爲其伸雪獨出數百金脫之於獄人咸義之

周河田字漁村母疾晝夜侍牀下不解帶者月餘性好義樂施予有疾姪孤且貧河田爲置產授婚宗祧賴以不墜邨有孀婦家赤貧兼嬰廢疾河田首出貲並勸富室輸粟以資養婦賴以全活後婦卒復爲之立嗣尤善排解里有紛爭聞之必往爲開諭使皆冰釋乃已鄉人咸德之卒年七十有二

李惠我字愛棠恩貢生友于敦篤與弟惠軍食息必偕雖白首若童時怡怡如也後以食指指繁與弟析居田取其瘠器取其敝悉以美者讓弟弟卒撫諸姪若已子性直諒重交誼見者以爲有古人風

王作霖字雨生拔貢生考取八旗學教習以母老歸養母歿喪葬如禮與兄同居二十餘年在兄前未嘗疾言遽色有姊家貧奉養終身姊夫歿無以殮亦作霖出貲以營葬晚年尤篤於宗族曾自捐田以奉祀卒年六十有三

李延順字成章太學生少失怙友愛兩弟將私積入公嗇已奉人遇水旱兵凶危苦萬狀身任其責卒濟艱難兄弟同居四十六年家人敬而愛之絕無間言歿後始析居母初歿痛絕家人環救逾刻始甦愛姪鳳昌逾已子訓誨無少倦比鳳昌補諸生始色然喜居鄉里善解人糾紛

有爭鬪者至前立解歿數十年後同里猶感其德云

張文樸字崇實父桂林武生早卒文樸方八歲賴母氏崔撫之成人性長厚好施予咸豐七年歲飢鄰人賴以全活者甚衆光緒初歲又飢里中百餘家窘甚文樸儲麥數斛分贍貧乏無餘賸或勗其簿記笑曰異日不責償何記爲妹孀子幼文樸迎養子旣長爲置田宅謀恆產焉弟文言字足志少兄五歲性聰穎潛心經史解悟獨眞督子姪讀書手不釋卷事兄友恭鄉里重之文樸子毓山文言子眉山魁山俱諸生高峻騫字鶯喬樂善好施雖家不中貲有善舉每樂輸恐後嘗與邑人共結一社施藥餌綿衣力爲倡首又酷嗜善書凡先儒勸善懲惡之編無不博採窮搜羅而致之置諸座右擇其尤足醒世者摘錄節取輯爲一書名曰悚心集書凡六卷付之剞劂其後年老力衰艱於行步遂杜

門不出專留心於醫道聞有奇方則隨手登記間或製爲丸散以備施送及歿後患病者猶追思不忘往往親詣墓前拜禱云

白宏憲號樸園縣丞性敦厚樂善好施與朋友交久而彌篤人所乞貸約積數百金彌留詔家人將券悉焚之族黨中有控訟者必諄諄勸諭解乃已並代爲出資結其事終不使面質公庭凡居心行事多類此卒年五十有二子省三候選府經歷孫廣孚庠生

戴鶴敏字仙羽性亢爽居鄉里峩冠古貌人皆嚴憚之然待貧乏有恩有市僧導遠賈詣鶴敏乞糶僧有輕重二量陰以輕量出之束載十數乘約去五里外計數居奇且不貲僧以告鶴敏揚揚有德色鶴敏大駭曰豈有戴某欺人自昧者立命追還準償之戒子孫勿習商賈蠹心術勿爭田畔傷厚道人有勸置田產者曰人苦不知足兒孫才不患不温

飽不才舊業且不能守又何事曾益以益其過乎人以爲達者之言年

七十九歲卒

以上均據采訪

賈心忠字貫一母中年目雙瞽心忠敬養曲盡始終不懈母疾心忠焚香跪禱院中雪滿地盡溼獨不濡心忠衣母疾遂愈教諭莊允觀聞其孝欲爲請旌心忠固辭客亳州歸渡黃河至中流大風忽起舟傾欹水已半艙衆惶恐心忠以歸養望空自禱竟無恙及岸令同舟人先登心忠最後舟人衣履盡溼而心忠衣無水痕孝行之驗此其最著者年六

十四卒

以下嘉稱

張連會字聚奎歲貢生性篤孝友家貧奉親無缺凡父食所餘雖一飯一粒必親食之未嘗委之他人居親喪泣血悲號不離苦塊者百日鄉人謚爲孝文先生

劉世平太學生友愛兩弟後喪季弟撫季姪如己子好施予嘗出資財以葬人之親全人之婚姻鄉人稱之

董峭字秀峯事親至孝友愛兄弟食臥必偕家政嚴肅子姓半白髮侍立終日無敢倦瞻養族親外計一年所餘粟米在門前置升斗減價賣之逋欠無追償也同產共爨五世同堂不析居實爲昇平人瑞

劉體蘭字同軒入泮後因親老不應科舉孺慕奉養成以孝稱里中偶有紛爭一經排解無不化爭爲讓嘉慶十八年歲大饑公捐粟三百餘

石以濟困阨全活甚衆

以上錄
盧志

梁盛樂字敬業武生善事繼母母亦視若己出父中年失目出入扶持未嘗離左右四十餘年如一日

梁盛倬字漢章增生少孤每值父忌辰必焚香泣食不下咽者數日母

年老寢不離側髮逆過境舉村盡徙倬奉母獨不忍去賊至詰之倬涕泣哀求賊爲所感動守其門者竟日母子俱免於難著有愛閒堂詩草孝經淺說

梁方基字端夫增生性至孝父母歿哀毀骨立三年不露齒每讀書至蓼莪之篇未嘗不淚下如雨值忌日致祭墓前涕泣終日儒林稱之馮雲亭字曉樓急公好義咸豐間軍務需欸慨輸餉金歲大凶出粟平糴欠不追償一方賴以無餒

賈迺宣字德三廩貢生慷慨樂施爲無力讀書者代備束金設學延師村人修寨獨捐其費之半

以上錄縣志

張方良官獨山屯屯官咸豐元年河決爲岳家所收恤及南匪據穀亭聞岳家被陷奮身入賊營中救出又貸船渡親朋百餘家破產供給家

海寧縣志卷之四
年一四
一四
一

貧不怨

以下
魚臺

王文顯字達陞太學生重然諾尙氣節倜儻不羣時土匪倡亂文顯團練一方嘗率衆禦賊生擒十二人獻之

王儒行字席珍武庠生慷慨好義事繼母無間言撫異母弟毫無畛域咸豐間南匪北犯練義勇以爲一方保障長子友直庠生學問博洽尤工音律時論重之

盛瀛濱字仙洲增生性剛直有古烈士風咸豐辛酉金鄉陷變衆洶洶有潛相通者瀛濱負劍大言責以義並曉譬利害衆志悉定一時德之張振武字虎臣性公正識大體同治間助金鄉人挑東溝完固堤防水不東溢一方賴之

隨蓋字獻忠家素殷富每逢歉歲輒出積粟任人乞取弗索其償皖匪

北擾僉議築圩以資捍衛蓋獨輸重資俾得成事卒年八十有六子煥章乙未武舉人寬宏厚重有長者風

馬奇峯字岱雲候選州同世以忠厚傳家咸豐十一年修城奇峯助銀二百兩同治元年六年二次助南陽寨工共銀四千二百兩屢膺上官榮獎卒年八十二

馬福迎字祥止太學生性仁孝分多潤寡敦睦親族友愛彌篤兄弟五人一堂耽樂有長枕大被之風

任賡唐字贊襄候選縣丞性廉正明醫理以濟世活人爲心尤樂意施藥療窮民病壽八十有奇

王作哲字鑒普樂善好施皖匪入境親率鄉鄰築圩禦之兵械自備有不足者出粟給之不計償餘資散盡豁如也蒙其義而脫於難者千餘

家焉

郭登契武生養親以孝聞咸豐九年築寨禦賊數十村賴以托命屢逢
皖逆圍寨兄弟三人晝夜登墻巡警寨賴以安鄉里稱盛德焉

馬聖符字揆一候選訓導世居南陽咸豐同治間捻匪與教匪合勢欲
夾攻閭鎮士民與鄰邑避難者無不惶懼聖符倡義團練決勝運籌爲
一方之保障

劉泮字芹亭皖匪猖獗泮與從兄涓從姪鏡倡議建圩月餘守備完固
賊因無隙可乘遁去尾其後生縛者數百人僉曰殺無赦泮與同事議
曰此皆係擄掠情有可矜遂得全活於是同圩及獲宥者均以手加額
曰吾之生全皆劉公賜也

隨漢章字倬卿太學生品行端方人皆以長者目之皖匪擾亂建議築

堡凡守禦事無不竭力籌畫附近諸村賴以保全

梁陞字龍驂廩生先世籍東平系出先賢梁鱣明初遷魚父廣友太學生稟性剛方嘗出資以平鄉里之爭陞性至孝事父母無違父母或因事失和卽依依跪哀以救事卒得解陞沈潛嗜學博通經史教授生徒嚴而有序至事關學校尤銳身自任不辭艱險以期有成云

以上錄縣志

胡聯魁字星齋性孝母陳氏患腿疾出入必躬掖湯藥必手進經歲衣不解帶母有所需必身親從未假手他人待幼弟友愛內外無閒言年六十一卒時老母在堂易簣時猶緊握母手頻呼阿母不止其純孝至死不變里鄙咸稱之光緒戊子春饑施粥施衣活人無算孝義一身兼之

馬國均字秉臣武庠生孝友出於天性父母有疾親視湯藥不離牀褥


及歿哀毀過甚致染嘔血之疾喪後廬墓四年手植樹七百餘株躬親灌溉樹成始歸事兩兄尤恪謹長兄經營商業次兄充一鎮董事每以事外出至晚不歸雖烈風疾雨必候於門待猶子愛逾已出子汝橋貢生試用縣丞

任鴻文字煥章太學生咸豐元年縣境黃水爲害傾糧九百餘石賑濟之全活無算

任貽和字美庵武庠生守備銜咸豐七年歲大歉鬻地兩頃餘以賑饑民

任守爵字惟五州同銜性好施修橋梁以便行人捐貲財以設義學歉歲散財賑饑其急公好義如此

于信五字敦彝歲貢生性孝友身事三繼母循循子道待異母弟冠五



最友愛父歿事繼母張孝敬備至捧盤撰必躬親出告反面如少時教人先德行後文藝卒之日弟子百餘人哭之哀并勒石以誌感

岳佐階字殿陞好施予鄰有不舉火者必慰問贍給之值歲饑開倉平糶甚至稱貸以繼有匪蜂至村鄰惶恐有一匪後至曰此岳善人家也屠之不祥至鄰村殺掠無算岳姓則一無所擾云

姜錦字尙絅衛守備銜咸豐二年春大饑出粟二百餘石賑濟貧民九年坡東白蓮教起出資糾衆往剿一縣賴以安堵

劉文蔚字豹變武都騎尉道光二十七年倡修文廟約費二千餘金咸豐七年歲饑出金五百以賑之

張九圍字式寰附生孝友樂施鄰里有斷炊者親給粟米有田千餘畝因濟貧售其半數云

閻廣信字思誠庠生捐資創修閔子祠因奉祀無人祭田失沒親謁衍聖公擇宗族應繼之閔祥麟爲奉祀官云

李硯田字藝圃父汝澹好施子每薄暮携錢千百遇窶人分別給予戚族貧乏者給月餼以贍年六十卒硯田樂善好施克承父志鄉里貧不能葬者曰於我殯會皖匪北竄倡議修穀亭砦慨然將南鄉寄莊地二百餘畝變賣充公駐防統領某嘉其義擬保知縣遜謝不就

仇化璧字穀藩孝義卓著人無間言光緒年間邑令曾倡辦倉穀化璧慨捐巨資並竭力勸募得成善舉會年饑發倉賑濟活人無數更倡辦團練創修砦圩濟困扶危之事不可殫述

以上均據采訪

忠節總傳

見危授命殺身成仁如前志所載之徐標楊定國諸人洵與日月爭光然孤忠介節無代無之惟時際承平末由表見耳咸同之季匪亂頻仍而州當其衝羣賊北來金鄉先陷存亡俄頃岌岌可危幸能措拄頻年力與抗拒卒賴幸免而死者已纍纍矣茲爲撮其事蹟並著於篇而以筮仕於外捐軀者弁于首焉

李琪字樹香浙江秀水縣丞歷署秀水遂昌和縣咸豐二年鄞縣梟匪滋事奉委帶勇隨大軍勦捕子幼鼐督後隊從之賊大至琪被圍力戰陣亡幼鼐見事急破圍入刃數賊亦死越三日家丁張貴得琪尸水中刀矛痕遍體負之殯於嘉興八年歸骨故里幼鼐死亂軍中尸未獲事聞奉旨優卹入祀浙江昭忠祠幼鼐格於例未卹亦附祀焉

據丁雋李氏家世略

李幼輿字琴舫庠生父琮官江蘇常熟縣知縣沒於任幼輿扶柩歸葬服闋亦以知縣需次江蘇奉差五龍山解炮旅調江甯浚河咸豐三年二月粵匪至江甯水陸並集幼輿停工人守與候補令裘傳同守儀鳳門地雷發賊驟登雷又發賊自斃千餘官軍蹙之賊自他門入幼輿仍督兵抵禦刃攢焉一軍盡沒事詳蘇省鑒忠錄幼輿之登陴也遣家丁陳六奉其母書略云忠孝不能兼全城之存亡卽兒存亡之消息也信未發城破陳六隨幼輿戰死裘之僕高溪自江甯行乞達蘇州持書報長元吳三稟制軍怡良蘇撫吉爾杭阿飛章請卹贈知府銜給雲騎尉世職襲次完時以恩騎尉世襲罔替幼輿沒數年堂弟幼惇幼鶴先後殉難於浙江幼惇字敍五四川陴縣知縣珙子官江蘇吳縣典史委管軍需局賊陷蘇州坐守軍械所不動賊揮之去幼惇罵曰我辦一死豈

懼汝草寇也賊遂殺之署督薛煥以軍情亟未遑查奏鹽院喬松年奏請賜卹其母許氏妻楊氏俱殉焉事詳列女傳中其子學梓年三歲乳媪楊氏携之逃赴上海始得確耗幼鶴原名幼騫前四川候補知縣珣子浙江候補典史署青鎮巡檢卸任後守杭州省城咸豐十一年十一月十七日城再陷死之時城中乏糧幼鶴絕食已六日矣

李承恩字雲坡歷任安徽六安泗州直隸州知州咸豐三年供差廬州府髮匪圍城承恩助守城陷殉難奉旨賜卹給予雲騎尉世職

劉萱字文鼎秦弟咸豐三年以守尉需次歸德髮逆犯豫地當衝要竭力戰守勢窮援絕城陷殉

潘遵誥附生客冠縣傅公幕時逆氛熾孤城無援勢不能抗傅散金遣客去誥與衆退至客舍日食人食忠人事臨難棄之非義且城守須人

河東山陰州志 卷十四 十一
吾輩宜相助濟則爲天之福否亦不過一死耳僉曰諾遂不行比賊大至城陷傅公死誥亦殉焉誥瀕死以手醢血猶罵賊不絕口事聞配享傅公祠并入祀本州忠義祠

張文坊字石樓增生前志淑渠曾孫幼失怙事母孝性好學能刻苦自勵咸豐初粵捻亂日亟文坊任北鄉十三莊團總十年捻匪由堯竄濟文坊率團丁百餘禦於何家岡東大橋以衆寡不敵力戰死旬日後始得屍殮之面如生時年四十有五事聞贈雲騎尉世職

靳德誠附生成豐九年幕游殉捻匪之亂子儒博襲恩騎尉世職

王清碩河標中營外委咸豐六年在西南鄉馬房屯攻捻匪陣亡配享僧忠王祠

胡堯田咸豐九年南匪北竄帶領團丁截之被難入祀忠義祠

馬萬春字冶山以行伍起家性倨強好勝負氣同僚嚴憚之任東督標濟寧城守營守備恩威兼濟士卒樂爲之用咸豐十年捻匪胡四糾黨自鄆鉅擾金鄉分道來犯河標參將孫延畧游擊周貞元出師禦之使萬春居守萬春曰是謂我不成丈夫也武官遇敵而不出將焉用之遂擐甲爲諸軍先首遇賊於牛頭河逐其前驅斬數級繫馬項下憑河阻守翌日賊大至我軍分地堵勦萬春率所屬把總石貞等列陣新開河中營儘先守備千總傅朝立把總米渠等從之賊衆亂流而渡我軍擣其中堅賊張兩翼包抄之後軍潰萬春等左右衝突不得出朝立揮諸軍競發火器賊應聲而踣再接再厲賊不少卻日漸昏兵盡瘡痍萬春馬亦蹶朝立貞渠皆下馬殊死戰短兵接朝立遍體鱗傷而殞猶握刀不釋鬚髮怒張貞渠駢肩死亂軍中萬春手刃數賊刀竭捐軀全軍熠

焉中營把總李德宗左營把總劉鳳鳴陸克勤右營把總張應鼎守備
銜把總劉善傑城守營經制外委王晏清効力武舉李殿颺等俱歿於
陳事聞特旨予馬萬春祭葬世職子德駿襲雲騎尉朝立貞渠德宗鳳
鳴克勤應鼎善傑晏清殿颺亦先後從優賜卹時石刻王德鴻同隸河
標營從戰於安居鎮迤西不利遇害並入祀昭忠祠

陸克勤字振邦河標右營把總父長齡河標中營都司有勇略克勤生
而英武咸豐十年捻匪北竄克勤率兵禦賊於安居鎮戰不利力竭殉
焉贈雲騎尉世職

劉鳳鳴字書岩武生河標右營外委適江北匪亂奉委赴揚遇戰事屢
有功補河標左營把總兼充河督巡捕差因公回籍時定章差官例不
出征鳳鳴奮勇請効即於城西安居鎮史家海子陣亡入祀昭忠祠給

雲騎尉世職子延廣襲廣以其父殉國難誓報父仇率兵禦賊於青州府亦陣亡父子一門同死王事其忠節不可沒云

王兆穩咸豐十年九月逆匪犯境隨團長勦賊陣亡入祀昭忠祠

張恩縉字雲麓廩膳生性剛直咸豐十年館葛亭段氏時髮逆竄擾率鄉團禦賊以衆寡不敵爲賊所虜賊見其魁梧欲携與俱去恩縉痛罵激賊怒縛至村東斃割死其姪樹勛素以孝聞聞耗冒險往陷於賊巢三日後得釋卒至其地訪之以屍身不全無可辨識其友段華堂因其束中衣之帶始能識之因令其姪負屍歸葬焉同時有段東明亦以罵賊遇害其家屬及三歲幼兒幸有義僕馮二羣保護出走以免義僕馮二自有傳

劉華堂字煒萼咸豐十一年禦賊陣亡入祀昭忠祠

河... 卷一...
張仰育字春田附生成豐間父鳳文辦團匪至死難請卹賜雲騎尉世職

張大煊張高堂均於同治四年守運河禦賊被害入祀昭忠祠

邵承恩同治四年南匪驟至爲賊所虜賊以其年少強使之從承恩守大義罵賊死同時有翟書鈞卽允昌楊正相李體仁均以罵賊死何元鏜王茂德俱遇害

鍾存仁焦振麟均武生同治四年城西鄉安居陣亡是役也城守營兵五百人巡防城西鄉安居猝與賊遇兵力單薄五百營兵盡爲賊殲僅餘十八人幸而得免同時髮匪佔據五里營死難者有張寶桂何興隆朱學立及文某李保恆孫虎

祝德行字步雲同治五年捻匪北竄偕弟錫廷遁行稍遲遇流賊脅之

使從不應遂遇害

張大煊附生同治五年南匪復北竄賊首小閻王攻大長溝大煊率團丁護守之寨破遂被難入祀忠義祠

張瑞亭六品軍功於咸同間辦團練遇匪與府經歷伍承風及翟謹堂張秀枝張鳳文曹盛松宗維城暨團長團丁七百三十七人義勇六十四人人民九百三十人同殉彙案請卹

馬茹麟字叔連慷慨好義有俠氣交遊多知名士每讀書遇節烈事輒慨歎久之光緒之季幕游川省適駐藏辦事大臣奏調川軍改編爲駐藏陸軍隨營到藏波密事起派委安設馬駁開闢運道轉運糧餉著有勞勩宣統三年兵番忽起衝突疊傷我軍乘勢前進遂燒我革治場軍糧局軍心渙散不可復振茹麟乃語長官曰我武不揚何以對國我請

以死激厲士氣我死後諸君好自爲之遂仰藥死年四十有七諸軍士感其義收合餘燼均以死鬪始得自印度歸國而茹麟遺柩遂葬於烏

斯江岸側

以上均據采訪

周葆申字藹園爲諸生試輒冠軍名藉甚道光乙酉拔萃己亥中經魁品端學正四方文士多宗之歲甲寅館於單聞粵匪將渡河曰邑恃城當固守且吾世於此安可先去爲民望遂不赴館督衆防北門五晝夜

城陷子如山俱殉姪朗山增生被執賊脅之欲去厲罵不屈遇害

以下金鄉

張蔭松字蒼岷附貢生直隸大順廣道體公孫南河山盱通判慰祖子也強毅練敏每地方有公事率先奮勵甲寅春長髮賊竄東境縣令知其才以團練防禦委辦嬰城固守力竭城陷與兄蔭槐弟蔭南蔭桂子春熙從子振灼俱戰歿

周芝錦字仙貝增廣生應事多才甲寅粵警急同里歲貢張麗元約與同造冊會集城中士民願入冊者助城守衆皆欣然順從遂率子姪同嬰城數晝夜城破與子四人秋巖等姪附生春巖同遇害

周儒源字洙泉捐職從九品少孤事母至孝踴躍公事甲寅之變爲北城團長率勇固守晝夜勤勞城破與賊巷戰遇害其弟附生西源本鄉居聞賊渡河率子來助守城同遇害

張孟琢字礪菴聞粵警率子孫同登陴分守城城破與二子鍾鉞孫清姪孫映垣同遇害

張來陽乾隆六十年舉人嘉慶元年以孝廉方正徵任江蘇興化河南鄆城知縣以廉幹聞母憂歸不復出生平剛果自好咸豐甲寅粵寇將至毅然任之率子孫僕輩守城城陷遇難年八十有六子錫珍嘉慶十

三年舉人任冠縣訓導並遇害孫某亦以不屈死

周錫鄂字東渠州庠生幼嗜學性至孝甲寅之變與其堂兄廩生錫燕附生錫魏錫邨等堂弟附生錫晋等協力守城城破同與賊接戰皆被害於城下一家死者十五人

劉掌翰字墨軒先世居單邑至父寶珠遷居金鄉曾任巡撫告歸後病歿掌翰事母至孝甲寅粵警急或謂之曰汝本爲單邑人似可以去答曰我旣隨父移居金邑多年理宜守金邑城遂率三人桂山等同登陴分守城城破父子皆遇害

周啟柏字石臺廩生治子加道銜貴州清江通判潞嗣子也啟柏少端敏有器識宗長者皆爲之議嗣潞以廕授山西河曲知縣初至謁上官慮其幼試以疑難事立斷旣莅任革蠹正俗案牘不留盜竊屏息大府

奇其才將逾格保薦丁本生母憂歸循謹謙厚不輕語在官事晚近習
尚率放曠爲名高負才者愈蕩軼視禮法若讎啟柏憂之曰此不祥非
獨俗敝也聞者皆姍笑益共恪自持不爲動制終將謁選值粵警急邑
令楊侯留辦防堵遂朝夕從計守戰事以間告生父及叔父副榜洛兄
廩生啟栢從祖幅錦從叔濬玉川等曰賊勢熾若逼此城無全理吾家
世受國恩恨徒死不能報然義也要竭所當爲耳皆曰然糾丁募勇分
隊訓練自率之膺城守賊至奮擊多死者已而城陷力鬪與幅錦等俱
戰歿年甫二十一歲

周履堦字晉夫庠生生平篤孝友重交誼與兄廩生履坦相切磨爲師
友然不甚埋帖括而於地方利病民生休戚則講明切究以時贊興革
儒師邑長皆推重之歲稔倡義舉資生瘞死多所全濟長髮賊告警與

當事畫戰守甚具昕夕經理不寐者旬日事亟言色自若曰敗則死危則亡分耳城陷與弟履墀俱從容不屈遇害子銜方守舍或勸之遜曰親在焉逃奔至父所隨死論者謂死忠死孝兩無愧云

張維堅字奉樸廩生幼失怙承母志樂施予長益端厚慨然以濟人利物自任每歲暮雨雪出米薪取求者酌給無吝族戚藉得婚喪者歲數十饑疫施米粥設榭爲殮科場詢赴試無資者必厚爲伙助他如橋梁道路及先賢祠宇之屬凡義舉必竭力倡助無德色以故遠近皆稱善人母喪客至數千觀者皆嘆羨妻爲置一妾詢已有壻家厚資奩費主遣歸王教諭者盛暑卒於官聞其覓市板皆陜急出百金槨板爲賻已亥大水雨驟至悉出所有材薪不敷撤小屋繼之重值僱人夫埽隄夜立風雷中督勸比明水沒新埽者尺許城廂皆嗟暗曰微鐵生衆其魚

矣鐵生其別號也道光丁未官紳舉應制科力辭不就於是一邑無舉者甲寅春聞粵逆北竄破家助城守然度勢不支賊至先令家屬赴水出禦賊賊有識之者曰此善人勸使去怒擊賊被創亦赴水歿聞者皆流涕賊之將至也語從弟朝振曰鬼可爲賊不可爲應曰諾卽自經死張潯江字春渠乾隆乙丑進士江西巡撫誠基孫候補主事鈞峯子幼穎異能文未弱冠入庠食餼性孝友尙氣節粵賊變作常語諸弟金邑城陋敝武備弱宜早爲防吾家受國厚恩當竭誠協力圖報甲寅春警至卽廣募丁勇朝夕訓練城南門賊衝也請於邑令獨任之命弟附生淳江製巨礮火槍淑江漪江督繕城垣從弟樹珣溥江濬江整隊伍稽奸細時時以忠義大節諭衆誓殲賊守陷五晝夜城圍槍礮矢石俱發賊死無算自辰至申賊益衆城陷與諸弟率衆巷戰復殺數十人力竭

俱歿親丁死者十八人

張麗元字一亭歲貢生幼敏異弱冠人州庠食廩餼文名噪濟堯間爲人方雅端靜旣數躋棘闈遂不試惟以課子孫讀書立品爲務家故不豐邑有義舉必竭力助成之粵匪渡河有勸出城者毅然曰吾先世居城中存亡分也卽率子孫登陴守城城破與子曰昀曰曷孫增生爾勦姪附生春暘春霆春藻俱巷戰死之

李于縉字雲臺廩貢生少孤事母篤孝伯母無子事如母性疏雋嗜義疾惡每讀書飲酒時時自歌泣人莫測也遇猥鄙或談說不平及諸齷齪事輒憤肆口慢詈旋忘之人多畏其剛服其直癸丑歲歉捐資餉餓莩拚骸胔無算粵賊之變力助城守語所善者曰吾輩幼讀書殺身成仁見危受命今用之矣城陷遇醉隸罵賊則大喜拊其背曰義友義友

卽端坐令四子奉水等環列助之罵賊異之欲弗殺已度其終不屈先殺隸復連刃其子擲於前不顧罵益力乃殺之相顧駭詫曰鐵漢鐵漢妻周妾楊一女皆自盡僕四人亦罵賊俱死

周維燭字蓉畦廩生乾隆丁未進士兵科掌印給事中廷森第六子博學好古善詩賦工楷隸書居京師二十餘年恂恂儒素尤好義嘉慶癸酉歸自京會教匪倡亂急捐資練勇製守具晝夜城上者十餘日城獲全議敘七品銜居家課子弟遊其門者率工古文詞彬彬爲風雅士甲寅春於單聞警急歸率子姪登陴守城賊望見呼先生招之開門大怒投以戈賊以火槍逆擊殞焉城破子庠生鼎助崇助姪衍禧衍福姪庠生榮第榮誥榮河榮簡姪孫寶泉等俱鬪死一門殉者十六人

周秉鑾字叔御庠生端厚樂施予邑人稱善士年近六旬益刻志讀書

曰此吾儒也業舍此奚事癸丑冬試於郡聞粵賊北竄同人聚議謂城小而惡賊若至將奈何或曰守或曰避秉鑾獨默然或戲之曰子不畏恃依壽河耳亦不答及城圍將陷語妻宋子庠生炎曰城難保吾儒生不能報國敢辱身乎率闔家至壽河悉令赴水死乃北向再拜自投於河以沒

張沂春字蘭岬監生幼隨父裕任廣東陽春知縣理家事以孝友明練聞父卒扶柩歸遂不求仕進粵逆告警邑長廉其能屬辦公局繕城練勇多方備守具不懈賊至督率守禦發礮石殛賊衆甚夥既而城陷賊入焚其舍急歸護父柩賊刃之傷鱗次以歿柩竟獲全無損壞

周懿字淑存家世諸生以清品篤學爲邑望懿少入庠恬雅端抑望之藹如也好讀書然泊於進取羣從兄弟多名士每會集惟以道誼相規

切粵賊之變語子錫邢姪錫鄭錫郜錫滕錫韓廩生錫燕增附生錫魏錫邾錫晉錫豐等曰吾家讀書此臨大節時也智不能謀力不能戰要無大負吾書耳卽相率登城守禦城陷不屈俱歿

李世昫字稼民庠生父朝琛貢生博學善文爲邑宗匠世昫幼敦雅爲詞章有父風端潔寡營家無儋石泊如也年逾強仕患股疾粵匪逼或勸之出怫然曰守義也敢以疾逃執械登城守西門遇害三日面如生高霞錦字仙峯幼聰悟病跛好讀書邃數學自謂無功名分不試亦不理家務惟敦孝弟事與從兄同居白首怡怡如也粵賊告警年七十四矣憤老無能爲日拄杖巡城督子孫協守甚力衆以吉凶問則曰今日之事義也不可論吉凶城陷子欽銘從子欽第孫鳳芝麟瑞芝秀芝英芝祥芝月芝俱死之賊以霞錦跛且老未殺也則以杖擊賊首乃殺之

一門死者二十六人

周肇岐字作山雲南升用知州會澤縣知縣祐廷次子幼隨父官滇三十餘年精強稱最以邊地多警常教諸子於讀書餘兼習武事肇岐見輒解悟既歸里入文庠以孝友諒直爲族黨重粵逆之變分守北門賊逼或曰城難保不如去之憤然曰吾故知其難保以家受國恩早辦得一死來矣城陷率僮僕殺賊十數力竭遇害

高鳳苞字棲梧恍慨多才藝精岐黃家言里人舉爲醫學訓科聞粵警請於官鑄礮造礮車監補城垣城門晝夜不懈時年八十餘矣賊至親燃槍礮礮炸灼鬚眉殆盡不動及城陷盡驅其婦女子孫赴水死而自投於河

孫靈樞字舒機幼讀書坦直敦樸意豁如也尤急公識大義粵匪竄擾

設守具晝夜城上寢食不暇賊薄城率子與練勇手槍礮擊賊事急或勸之匿咄曰如可匿何如開門延盜耶力斥之城陷巷戰被害

芮子煒城南芮村儒童也素循謹能文粵賊南來猝與遇誘之偕不可脅以兵不動徐勸之則曰吾不能先乘以馬曰吾不習騎乃輦以行未一里自投下數四賊恚兵之則大罵逆賊欺天吾肯從汝耶髮植皆裂椿以戈噴血罵愈力刀貫其掌牽之行數里不死行且罵賊渴汲道旁則佯仆若死者待賊飲急投於井以沒

張盛容字韞涵城南棠樹村人由廩貢授博平訓導告歸爲諸生以品學重於時端厚愷悌溫如也訓士以先正法士多化之歸田後益樂善好施每歲稔族黨以舉火村衝南北凡流亡及行旅之寒暄與飢者設食飲拯濟無算年踰七旬益健人人以爲善報甲寅春忽病弗痊而粵

匪入境家人議移避之語聞奮然起曰逆賊猖獗何令至此吾嘗爲儒官敢忘殺身成仁之訓乎乎趣具公服端坐而賊至厲聲責之被害時年已八十五

李庭英字石泉廩貢生浙江杭嘉湖道翮季子也少孤器識明達兄庭禧由拔貢京城指揮庭業由優貢令陝西而伯兄監生庭芬以目疾高隱不事家政悉委庭英孝義醇厚爲族黨重諸兄歿凡邑公事官紳並首推之粵警聞與姪有程等議曰吾邑衝南北而城小無守具賊銳至恐不保當速請兵然兵之不能救急久矣賊一晝夜馳數百里而文移往返動淹旬日其曷能濟賊勢剽不顧後若渡河必速馳與北股賊合誠能固守三四日賊未必肯留攻小邑將自去遂請飛檄趕救兵而急繕城守庭英集族衆爲親丁招募義勇朝夕訓練賊逼率衆登城望賊

氛太息曰賊衆守弱吾儕義與城俱碎耳勵衆擊賊屢却益進城陷與子庠生有權有稔姪庠生有穫有馥舉人有程姪孫庠生惠疇德疇恩疇洪疇億疇及族姪州同仲昌童生昌言等族孫歧齡庠生一梧童生紀等並死之李氏死者計四十餘人有程庭禧子辛亥舉人風裁清峻力學好古尤嗜易著圖說未刊遇難年尙未三十開者尤悼惜之

蘇檀字俊甫道光己酉拔貢幼俊爽而篤雅詩文及書法皆秀偉邑令楊侯選拔同舉士也重其才引參謨議未嘗以私事干嘗得粵西人傷亂詩諷誦之搯腕太息或泣下每欲爲和作未果而粵寇至悉心力畫城守城陷罵賊被害

尋衍樽字又陳幼磊落雋異父舉人方漢邑鉅儒也奇愛之教以博綜通古今補諸生不能俯首爲時墨試輒蹶嗣父貢生方深故豐喜施予

衍樽益豁達輕身視世較錙銖爲商賈態者輒鄙不屑道以故人目爲狂而家亦漸乏然愈自信好談忠孝大節問及時事每太息有憂色粵逆之難慷慨助城守與子于疇俱被害

周福錦字繼庭皖匪之亂捐金募勇統率防禦被創死長子玉川字航之增生曾以詩賦甲一郡與父同罹難其次子及姪五亦殉

周嘉楨字仲茂皖匪之亂守東城城破急奔家驅闔家殉難未竟賊猝至嘉楨從容赴義死

周榮第字花臣廩生篤學能文皖匪至慷慨誓死城破殉難

周萬錦字福堂候選布政司經歷存樸子豪爽英偉有古風隨兄彤錦守城彤錦創仆萬錦挺立前鬪即遇害

周鼎勛字功山廩生繼燻子皖匪圍城奉父命持書擲城下云吾城池

堅固上下一心可戰可守爾畏死遠颺可也賊仰擊之墜城死

周義臣原名瑞賢以字行附生早失怙事母以孝聞性鯁直言笑不苟游庠後教授生徒孜孜不少倦門下多魁傑士拔貢蘇壇其尤著也皖匪之亂城將陷召諸門人至其家勉之曰汝等讀聖賢書當以義自取今日之事有屈辱於賊者非吾徒也於是從之游者二十六人次第遇害橫屍滿庭血流一榻賊爭飲之時避室隅者皆爲股栗子連元生而岐嶷年甫成童每搆一藝風發泉涌見者曰此偉器也是役並及於難周治字惠民廩生皖匪之亂拒賊創甚死弟洛字晴川道光十九年副貢偕兄治出門拒賊同遇害子啟栴玉立廩生有夙慧已酉科鄉試擬元因三場遺失被落士林惜焉及守城城破後救父被創死

周春巖字鶴村附生醇學工書魁梧有力粵匪之亂拒賊於柴市賊隨

風縱火骨髮焦灼死

周俊源字竹溪效用河標監修宗祠頗有功皖匪之亂城破遇害於仲長統墳側

周錫邴字季甫附生皖匪之亂賊至登陴指揮叱咤聲爲之啞舉石下擊連斃數賊賊少却未幾中礮死城上胞弟附生錫晉亦殉難

周潯字苔莊性孝友父兆錦字延鴻號古漁嘉慶二十五年進士翰林院庶吉士歷官河南南召縣知縣甘肅鎮番縣知縣升涇州直隸知州署鞏昌府平涼府知府所至有聲耽吟詠時得天趣著有我石齋詩集潯幼與弟清字芹圃隨父任讀書兆錦聞南寇北逸急命潯清星夜回籍助邑令防守城破同及於難

周如山字壽岩葆申子粵匪之亂聞寇至其父命率眷口避亂已留守

城如山曰父死忠兒死孝何忍去遂殉之

周朗山字玉屏增生舉人葆禾子古試兩次冠一郡擒匪之亂當城陷時有以縋城勸之者毅然曰吾弟在外吾父母不憂無後吾當隨吾伯

父與此城共存亡也遂與葆申父子俱爲賊所戕死

以上錄
盧志

李慕白附生性敏果有膽略居與豐境接爲賊衝慕白綜理團練東南賴之八年十一月十日捻馬數百入掠卽率丁勇迎擊殺傷相當賊益集衆勸之退不可力戰死

李錫瑾武舉魁偉善騎射急公事南方團練多倚以辦賊聞賊至率衆禦之戰於張家灣賊勢盛丁勇漸退散錫瑾射殺數人力竭被害

張繼芳監生爲團長率衆擊賊鬪死

李正基監生幼豪邁以技擊名一時咸豐戊午年八十餘矣聞賊至憤

往迎之擊殺十餘人而死

李應琨忠果有勇力年老矣憤賊橫欲擊之衆勸阻不聽力戰死

翟錫九州同知邑團練羊徐爲最翟氏尤習武略善擊刺八年冬月皖匪大隊入縣境自東而南而西錫九等率練勇數百往往擊之大呼殺入賊披靡已覘其人少無後繼縱騎圍裏錫九等力戰不得出遂死之團長同死者監生翟以俊生員楊桂榮文童邵汝濬邵汝潮殷象德殷之鐘皆斌斌儒雅士也

翟士炯監生爲人雅潔工書法有清望世居城西關年七十餘矣賊至脅與偕大怒叱辱之被害

李茂齡字蔚園仲兄岐齡甲寅守城殉難茂齡以敏練襄辦城內總局事偶出遇賊勸與俱行怒罵之被害而北城團總周春源亦以不屈死

其鄉居以罵賊死者貢生李玉孚年七旬餘矣廩生張時敏與其族兄弟數人俱死閔德罵賊被創未絕也投繯死

楊培梓咸豐八年十一月皖逆將至父命之逃對曰父在焉往及賊至執其父索金帛培求免父不得因以劍擊賊馬馬逸父乃得脫賊恚衆回擊培鬪且罵斃數賊力竭遇害

莫魁軒矜氣節咸豐十年皖匪之變時年八十餘矣聞警督其子監生六品軍功大紳調鄉團堵禦未齊賊掩至督其子大紳率數十人迎戰愈聚愈衆父子同遇害

李文翰字耀廷嘉慶庚申武舉貌魁梧勇而善書癸酉教匪滋事鄉城賴其力例補千總弗就撫憲賜匾曰提禦有方咸豐十年庚申年八十矣豫匪至罵賊被傷死

邵桐字迎旭附生性樸訥而剛方過人十年庚申冬南匪寇境里人避山洞中時桐七旬餘止洞外被執匪脅令呼避者出厲聲曰任爾碎我弗呼也並其子死焉衆賴以全

孫孺子繼興孫爲勳之子貧未讀有至性庚申冬豫匪破化雨砦恣殺壯老脅幼者從已愛孺子許以不死忽一匪褫其父衣將殺之孺子號勸奔救脅者止之弗聽父子俱不免人以比古楊香焉

殷之璋字搢廷武生勇而有謀習匪出力屢蒙優獎拔補衛千總咸豐庚申承藩帥調與從弟之璽率義勇在大義廟防皖匪隊未整匪掩至接戰失利陣亡之璽字玉符幼而敢戰時見兄遇害不忍獨生躍身直前力斃數賊歿俱蒙藩帥奏請議卹

楊式金性恢闊樂施予歲飢輒出資濟人咸豐戊午以捕匪功議敘六

品銜辛酉會匪皖匪交至式金調團禦匪被害

高益壯恩賜副舉人性耿諒里人以直道推之賊至與子仲申厲聲責罵之一孫方九歲罵尤力闔門皆遇害族子于信于義亦死之

周春岩附生守南門賊入城遇之大呼曰此善以石投人者勿令逃則罵曰賊子誰逃者刺殺一賊而死同時殺賊死者又有周陸光兄弟云白擴田門前舊有賣卜者言多驗前數日占賊大驚勸白速逃擴田曰吾亦慮城難守但義不可逃耳卜者曰數也遂逃去擴田守城死

以上錄縣志

王硯田庠生與弟蘭田諸生同講學爭自砥礪性友愛皖匪之亂土人因化雨集築寨以守寨未完賊突至衆志未一蘭田曰兄決計當何往硯田曰寨吾桑梓地也如皆去此寨誰與守遂率衆登陴賊圍攻力屈寨失守兄弟俱被執賊誘降不屈死

李虎名于墀道光庚子從邑人李壘湖北通城縣幕辛丑十二月崇陽告變警亟諸紳挾官出避虎獨以所募壯士畧聚儉荒數十輩未暇訓練灑涕登陴誓死三日城陷率一小胥展轉巷戰血濺股衣重創不屈死居尺哀憫忠義醵金爲檢屍計將其血汙絞紵什襲珍重數千里寄至金並詳告力守及死狀周多泉爲作紫綬紵行

李守章字憲堂守備銜幼失怙事母無違尙義勇嫻武畧愛讀孫武兵法會時變里中推爲義和寨董咸豐戊午夏南匪大熾寨失守守章巷戰力竭負重創賊刺之中腹守章拔鎗反刺力斃數賊而後殞寨丁從守章死義者十一人

張知言字睦九器度深沈律躬勤慎一望而知其爲鄉里正人好讀書試輒不力以報捐賑餉功授布政司理問銜咸豐八年皖匪任賴洸大

隊犯東號十餘萬由豐碭北上恣意搶掠甚至圍劫殲屠而後已冬十一月警告益急家人勸之去知言則決意死守出家財募壯丁訓練之以備戰禦乃布畫方始賊竟大至遂遇害其孫道明已出村奮身回救奪戈刺賊不得亦被數創死之寇平有司上其死狀於朝遂得卹典如例

張緯字坤華性豪邁不拘小節幼讀書厭佔畢業旋棄去以貲授布政司經歷癖嗜酒飲必醉醉必使氣謾罵坐是恐嬰旤因不復需次咸豐八年年六十餘皖捻警聞日劇因號集村衆計守禦衆皆無守志緯知事不可爲急麾家人走而言自有備於是以大鎗烹酒洞開重門日夜痛飲以待賊之至翌日酣飲方濃突有數賊至前聲令出酒飲不爲老者害緯猶箕坐按杯徐翻白眼謂賊曰我酒興足矣待爾輩來亦甚急

我酒豈賊可飲耶賊怒刺以矛罵益烈賊又以矛衝其口氣絕乃不復罵賊相顧曰硬漢而去有厨嫗親見之及家人歸殮時白鬚血汚齒牙觸矛落者猶滾動于脣齧間錚錚作響如有遺恨之切骨者事聞得卹張士敏字遜齋性識明警多大志讀書有記誦力強倍常人家貧不能置書鑿其博覽嘗借書抄讀手口相資自錄冊帙歲逾尺第好使酒任氣意所不可卽見於辭色坐是不善於鄉里生計愈益艱學亦日廢有舊從師館族人家惜其才乃招之使溫理舊學並息慫族人瞻其膏火數月補博士弟子員逾年卽以文學異等食廩餼遂出爲鄉塾師敏筆氣雄放千言不竭由是更發憤自勵識者皆以遠到期之皖捻撲境游掠鄉僻圍敏村村人已盡逃賊見敏儒衣冠誘之許爲掌書記敏不允乃脅以利刃迎腹作勢者再謂不降有死爾敏乃大罵盲賊裂眦高叫

曰畏死早去矣賊雛細認而翁豈畏死者速呈利刃來勿徒鬼臉戲而翁爲而翁辱遂遇害

郎奉典貧無業捻匪之亂投入軍籍躬率數百人轉戰滕嶧諸山中所遇輒勝賊中有遇郎不戰之謠僧邸嘉其勇授以軍功後至清江戰歿李明田字倬甫勤儉自持居心廉正精於醫術活人無算戊午南匪麇至與賊戰死

楊慶霖字瑞豐豪俠優於謀略嗜讀書嚴寒酷暑不釋卷書法挺秀居家以孝弟見稱南匪至與賊戰死

以上均據采訪

張夢筆李象辰王迎雲蔡清勤皆生員吳仲裔州同曹萬清蘇傳源等二十一名於咸豐同治間辦團禦匪於本邑團丁李汝岐李恂李若槐等一百二十一人同殉均請卹有案

以上錄通志

王大恩文庠生王官屯人倜儻有氣節咸豐四年粵匪過境本境捻匪乘機搶掠民難自保大恩慨然獨出率村里勇敢者將捻匪格殺無算賊更糾千餘人夤夜乘無備圍其家稱報仇大恩急登樓禦以矢石殺賊甚衆賊縱火焚樓全劫而去黎明火息骨肉盡爲灰燼惟餘乾腸數寸聞者莫不流涕至今人誦其勇義覺凜凜有生氣焉

以下
嘉祥

梁光第字殿魁候選布政司理問生有智勇恒以忠義自負咸豐十年南匪到境光第約本村監生李秀徽李芳山谷瑞光同率民兵二千餘人禦於城之西北殺賊甚衆但率未練之兵禦無算之師久戰力不支被賊夾攻同傾碧血縣令黃嘉其忠義詳請賜卹雲騎尉

以上錄
縣志

李養廉舉人劉恩慶訓導胡醇任兆昇李煥皆生員宋倫秀守備景作模五品軍功梁基鞏孫廣生皆武生宋際霖杜逢春張玠一百五名於

咸豐同治間辦團禦匪與本邑團丁王方太王欽典劉以莊等一千六

百三十二人同殉均請卹有案

以上錄
通志

王如芝與胞弟如蘭俱幼年入庠才思詩文均敏妙異常尤篤於友愛
適皖匪入境如芝被虜如蘭急往救之亦被虜焉賊逼降堅執不服同

時遇害恩子雲騎尉世職

以下
魚臺

田華先武生有膽略同治二年南匪入境率衆捍禦勢不敵華先奮勇
衝突刺殺數賊力盡被戕而死恩子雲騎尉世職

張雲亭庠生慷慨有奇節皖匪犯境被執不屈死

沈廷材監生性剛方不苟皖匪入境率衆捍禦力不敵遂遇害恩子雲
騎尉世職

張鳳翬廩生性情剛直行求實際咸豐庚申皖匪入境驅車北竄豪紳

利其財誣以匪類稟諸官與弟國學鳳萃生員鳳階等俱抗言不屈觸楹而死

楊東堂太學生皖匪作亂棄文就武精於槍法同治初年遇賊於河坡

殺賊十餘人力盡身死恩予雲騎尉世職

以上錄縣志

屈繼勛生員周如玉等六名於咸豐同治間辦團禦匪與本邑團丁張

尙儉高崇郭大照蔣永等二百三十人同殉均請卹有案

以上錄通志

濟寧直隸州續志卷之十五

文苑總傳

濟寧人文甲山左登巍科歷顯仕者比比矣然亦有懷才不遇皓首窮經日事鉛槧不少息讀書有得輒爲筆錄多能發古人之未發間或樂幽隱攄懷抱與二三知己吟哦以遣興其遺集有存有不存在乎其後者徒爲之慨想流風歛歛浩歎而已爰搜羅遺事彙爲總傳蓋以紀斯文之未墜云

王輝祖字爾充歲貢生熟精文選通音韻之學論作古詩須以三平落地三仄落地爲合格唐韓昌黎杜工部其正宗也從之游咸識其門徑著有韻待覆草詩賦鈔子培培增生

孫元復字苙坪附貢生歷任陽信膠州訓導少負不羈才博極羣書文

名藉甚教授生徒游其門者多卓犖特達士孫如僅殿撰亦在高足弟子列旣以屢躡秋闈橐筆游幕當時大府爭相延聘如不及生平嗜金石家藏秦漢碑版爲多工書筆力峭拔迥勁中姿媚躍出尤精漢隸晚年歸里門寄興草書渾義獻歐柳褚顏之迹自成一家得其片紙者如獲拱璧焉

劉恩霈字潤臣光緒二年副貢官內閣中書歸里後爲池樓書院監院襟懷洒落尤擅詩名

林樹梅字庾春諸生性孝友事繼母如母少篤學博通經傳喜吟詠兼嗜金石築靜室室中圖書滿目與古人相對遇知己作竟日談泊如也著有紫桂仙館遺稿

袁景珂字韻珊鴻孫優增生肆力於經世文字於地方公益力任艱鉅

不辭勞濟人士羣欽重之年未及五十卒著有蘊山堂詩集子文翰諸生文田縣丞

林之鵷字漢臣廩生幼孤承母訓勤於學食餼後舌耕養親嘗設教遠方聞母命卽就道在途中不食者數日比歸容枯瘠家人不識也爲文力追先正教誨生徒得其指授者多掇取科第子洛圖廩貢生姪雲圖諸生

王星奎字聚五爲諸生有聲庠序學政李汝嶠器之梓其文道光二十四年中副榜家貧授徒養母從遊者衆講畫評隲危坐終日無倦容嘗以字本六書韻爲天籟字之異同由聲而定韻之總攝以類相從乃以今韻推求古義苦索冥搜成詩韻便覽五卷大旨同宋賈昌朝羣經音辨取例御纂音韻闡微身歿後惜俱散佚不傳

采訪冊

周援琴字仙籟庠生性端直每書尙書無逸篇揭於屏風以自箴警爲

一時醇儒

以上金鄉

趙方城字荆翰經史淹貫性孝友與諸弟不異財不析居所著有說經

精粵談史霏屑

以下嘉祥

趙鈺字式如恩貢學問淵博精於考據著述甚夥多散佚

錄縣志

齊縣基字獻亭嘉慶丁卯舉人上達季子也性嗜讀於經解必參考衆

說源源本本教誨後學亶亶忘倦沒後門人思慕之勒碑墓前以誌其

德

以下魚臺

劉可瑞太學生見聞博洽明於大體乾隆甲申續修邑乘蒐羅採訪罔有遺漏邑侯馮公賴以成書士林到今稱之

杜尙志歲貢生弱冠食餼馮公續修縣志採訪校閱因事成文多出其

手晚年性情益和訓誨惟勤門人多有成就者

繆增智字善藏附生舉止以古人自期課子讀書嚴而有法長子鈞字伯治嘉慶癸酉拔貢文藻藉甚受知於鐵冶亭宮保讀書撫署中深得宮保書法之祕少子鏗字岱巖智慧夙成髫年冠童軍卽以優等食餼文采風流邑中仰爲山斗惜年未及壯而卒孫滋莆同治癸酉鄉魁

齊擴基增生惲基弟研究經史學授徒功課最嚴弟子多知名者遭歉歲領賑粟盡散於鄉里貧乏者而已不與遇事爲人排難解紛不辭勞怨子孝溥庠生佃僮有父風

賈青田字汝南浩川子優貢生邑中素無以優行貢成均者青田開其先也

楊聲振字雲喬嘉慶辛酉拔貢道光辛巳制科徵士歷任郟城新臺濮

昌樂教諭廉明白守常取給於家著有孟子隨筆

賈成田字維昀青田弟歲貢生履行純潔孝友性成嗜古勤學學者稱東巖先生子涪才一時日誦萬言每成一藝老宿不及十三歲冠童軍學使以大器目惜以夭沒

李法仲字允堂歲貢生幼讀書識大義髫年語人曰文無根柢不可以問世壯遊歷下與諸名士相友愛文章日進不屑屑於舉子業著書以開引後學有近思堂稿未梓行

張桐輝字宜琴歲貢生學有根柢文章典贍風華爲一邑師表著有經史摘要四卷子敦仁字壽山道光丁酉拔貢邃於文辭之學

張丕基字孟弼副貢生殫見洽聞以博學著聲尤熟於地輿星學晚年愈精每遇後進必詳舉典籍以開導之年至八旬披覽無間

馬亮功字巨川恩貢生候選州判孝弟友恭著有十三經略考弟克功字晴川恩貢生候選教諭品誼高潔文本於左國尤長於詩賦

馬崇本原名敦本增生孝友天成博覽經史熟於文選

趙華庭字光遠歲貢見聞淹博尤邃於易其文典贍閱深爲士林楷模
梁洽字化翔恩貢生志尙高潔嗜詩古文詞著有五經摘要湖山草堂詩稿

岳永甲字乙亭廩生父秀杰著作宏富邑乘載其文行永甲幼承庭訓砥礪廉隅著有春秋分國便覽六經管見輯要惜遭兵燹無存又著四書尋眞集其孫朝珏庠生

梁時迪字介祉號常春子增生隱居不求顯達高尙其志讀書南陽春秋閣字學僧懷素通義經得邵子先天之數著易一卷人有傳其集者

隱逸總傳

世之以高尙鳴者不必辟人離世以爲潔也惟不以紛華爲悅固已
加人一等焉然時當晚近知此者鮮得一二以傳之亦可以風世矣
史本字季屏前志工部製造庫郎中大倫子性瀟灑工琴善書於詩學
尤深年八十餘仿前輩天長令潘公自誌墓銘作自述一篇其略云予
賦性遲鈍惟讀書能記憶不忘隨宦京師時德州孫子未先生曾以小
藝二十篇授之好臨法帖王虛舟夫子又以倪寬贊太清樓贈之自是
文機稍開最嗜字學後歷從名師不敢自棄亦不敢自懈遂入國學肄
業崇志堂白戊午辛酉甲子丁卯四科未獲一第比年漸大而襟期無
異少年奈遭時不偶兩遭大故喪葬幸無忝又值兄弟析居家政紛披
遂不復攻舉子業而以其悲憤慷慨者發之於詩詞著有竹香齋稿從

此肄力於琴以寫其悲壯悱惻之懷託之於酒以借爲遣懷銷愁之物
從游泰山趙相國青岩書院得晤陳句山太常李因培閣學軒轅謀野
太史把酒論文往往漏已三下復游雁門關塞登泰望山渡桑乾滹沱
諸河故不覺恍洋排宕以恣其胸次入都與田公中儀程公春曇趙公
滄曉李君西平朱子青雷紅雨書齋分韻在籍與濟南程君敦夫山右
南君復堂爲琴社與戴君奉古李君鉄邨秦君宇華結六斟會與陳君
揆若秦君以濯陳君秀山爲詩社復與孫錢塘適齋張潞安潛齋趙郃
陽退齋時司馬虛谷作五簋約晨昏風雨問字決疑往來不休而最契
者鄭農部南池李秋曹道園程孝廉雅山孫亞元介圃時相過無虛日
焉然性好疏懶不問家人產甘澹薄食無兼味而胸坦率耻以機巧待
人人有以機巧待之者亦不自覺赴朋友之急當名簡之召纖悉必踐

其言期無負而後已慕婁師德郝處厚之爲人常以忍辱蒙耻爲箴銘
凡有拂意之事從不形於口晚年家益落而意趣不衰所歷升沈炎涼
之態恬不屑意遇知己快談遇酒局快飲遇好風月佳山水未始不悠
然自得喜作皺眉事亦不喜作皺眉語素性然也年逾八旬精力尙
健見名人手跡朝夕臨池不倦好逃禪焚香靜坐博覽釋典壯年與海
內名宿筆墨酬應若金壽門蔣老人鄭板橋沈蕉園盛柚堂牛空山傅
雲樵顏介子昆仲陳無軒張芭堂朱朗齋王菊莊錢大培往來翰札裝
爲冊頁倩黃小松題簽暇日對晤如逢故人云云

楊映楷字蘭谷生有奇表膂力絕人能隻手曳奔馬以臂擊石石立斷
讀書不爲章句精通道藏於易學尤邃性喜游隨身僅破書半簾蒲團
一具夜恒瞑目趺坐以待曉常十餘日不食食或盡數十人饌善摩窠

書道光乙巳粵逆猶未萌映楷語其友潘遵鼎曰余推數天下將大亂非十數年不止吾州當南北衝倉卒禍至非樂土子親老宜豫爲計既粵逆犯濟寧幾陷者屢時映楷已避地卽墨勞山亂平後卽棄家作汗

漫游遵鼎寓書招之終不返後卒青州

以上均據采訪

藝術總傳

易有云形而上者謂之道形而下者謂之器道與器一也前志傳方術凡陰陽醫卜篆刻丹青之屬均隸焉蓋以人各有專長不可以其小道而廢之矧今日歐風東漸凡百技術莫不有學而美術尤爲不傳之祕後之人當有百倍于前者用仍前志例以類分叙云

仙汝恂字訥卿增生爲邵蓮谿先生弟子蓮谿官夔州招之往以親老不復遠游工繪畫墨菊尤爲神品

朱鵬字枝山以知府宦游江南善淡墨山水筆法秀勁一時名流咸謂其疏木枯石自率胸臆蕭然遠俗不拘拘於宗法定可傳世云

吳奇字祝元原名允祺字竹源諸生才敏好學以書畫自娛見名畫輒臨撫之其勾勒點綴縱橫恣肆無不如意尤工花卉翎毛山水人物與

書畫家宮本昂松小夢相友善中年精隸篆然題畫多行楷名重一時弟允渠字鑑塘兄弟雅友愛允渠光緒二十九年舉人

馮汝騏字亦驥諸生善花卉賦色鮮秀有大家風韻爲一時名公賞識至今爭購遺蹟

蔣伯榕字蔭南善丹青工書法尤精八分著有草草草堂吟草

孟興聚字敬甫工蘭竹人以爲繼武板橋云

劉恩瀛字東之號仙洲性嗜古工篆刻善丹青人物尤精

夏謙字允吉號南橋其先浙江蕭山人自其先世有名聲之者以醫名游濟上遂家焉謙幼穎性孝友重然諾嗜風雅常留心篆籀隨長洲顧文鋌學精印章兗州別駕黃小松易篆刻爲一時巨擘每見謙作輒譽不置暇時喜學漢人隸書以韓勅史晨爲法沒後文鋌惋惜久之并爲

作傳焉

歐陽長豐字樂亭諸生家儒素性誠篤人或雜以戲侮一笑置之不校亦不報善藝菊每蒔菊無不茂工奕勝負怡然然出奇制勝之著每驚座客因以奕名於當時

李殿華字宸章事繼母孝待異母弟能友喜書法精岐黃

巫希點字紹曾諸生鴻臚寺鳴贊曾祖占魁祖延獻父鐸均以青囊術世其家希點尤精醫理一時有洞恒一方之目

歐陽長年字仙儕精於醫著有醫理淺說

王誠字致堂光緒十四年舉人以書畫名於時

袁潛字潛齋號石農工書畫有名

以上均據采訪

田伯穎字睿堂性孝友精醫術爲人診視不望報酬鄉里感之爲立石

以下
金鄉

張振田工按摹接骨術爲人醫治不受謝

周魁勳字元功性誠樸訥於言天真爛漫見者以爲有古人風工書法

骨格遒勁得其遺楮者咸珍藏之

以上均
據采訪

劉志升字躋堂讀書求實用不屑屑爲應世文而性情溫和風格超邁
尤嗜書法出入古名家中臨池揮灑日夜不倦晚年尤精進世得其片

紙隻字如拱璧邑尹禮之爲耆賓云

以下嘉祥
錄盧志

郭靖字小雷幼聰敏讀書識大意工畫水墨丹青精篆隸書法平捻匪

功敍守備

錄縣
志

胡時儻字仁趾別號湖山子丰姿秀朗有超超出羣之表喜交遊好騎
射遂冠武庠精於繪事凡山水人物花鳥蟲魚能得古人真氣得其片

紙者無不什襲寶之

以下
魚臺

劉瑞墳字宜昆性情和靜不務名利精岐黃之業以醫行仁術一生活人無算子欽禹官聖府典籍寬洪樂易克紹其型

楊士瑞字聖符庠生性寬和無畦町明岐黃術救人甚多壽八旬有奇
楊大焯字見堂庠生精楷法曾臨趙松雪見賞於劉文清公子均庠生
孫越選拔俱臨顏平原名重一時

楊大甯字樂山鹽運分司摹漢隸得古人神髓名重鄉邦

馬福恒字月海廩生少有茂才其爲文如天馬行空不可羈勒尤善於模歷代法帖無不得其神髓者

馬在止字函一庠生精於書法筆在歐柳之間所書廟額碑碣人多珍

重之

以上錄
縣志

張敦本字道源增生事繼母至孝因三弟誤於庸醫遂潛心岐黃著有脈診折中驗方隨筆待梓知縣曾啟墳贈仁心濟世匾額

楊金墀字雲臺號曉閣附生丰姿灑落神明書法工詩畫名振一時從孔太史昭慈臺灣道署有功績補河南儘先同知歸里後移情文翰花

竹卒年八十二子永錫亦善書

以上據采訪

僑寓總傳

濟寧跨運河往來南北咸取道於此又以河督駐節地官於河上者其子孫遂寄居此土與土著等地方有大工役及善舉亦力肩鉅任鄉里每稱道不衰茲擇其尤著者附焉

吳邦賢字俊民江蘇江寧縣人同治間隨父吉昌於運河廳任所光緒初粵匪亂後鄉里爲墟遂僑居濟寧焉邦賢以縣丞分發東河歷補河南安陽山東武城縣丞武城屬當漕運躬自輸將無或後時候補汶上縣丞未之任乙未歲饑與北平查筠江寧陳衍九籌賑濟遂創設粥廠於城內鐵塔寺西院捐款爲之倡時河員在濟者多均有輸助適長洲彭虞孫牧斯州首捐鉅貲永定爲例踰年復建屋六楹爲司事休息地惟欸不足無經常費遂議由閩侯龔秉彝銅山崔綏五上元楊樂亭山

陽項文彥將豫振餘銀九百餘兩捐爲粥廠基金林州牧芬又益之足千金嗣後臨榆王鴻陸適充安居南運局差代募長白豐鹽使伸泰暨南北運局各員共千金積有基本金三千五百兩而粥廠以成後以河員裁汰款綦難邦賢猶每歲多方籌募不至動及基本晚年嬰咯血疾然當嚴寒之際猶黎明親往廠地從無後時其勇於任事如此孫源曾山東候補知縣


陳恩壽字伯平浙江山陰人順天宛平籍父顯彝字秉初任濟寧直隸州厥後僑寄焉恩壽幼隨父宦游性警敏號知兵甫弱冠署登州府萊陽縣當咸豐歲捻匪任柱率大股東竄漸近萊陽督鄉團禦賊於小姑河獲間諜三人釋不誅曰俾知我有備則不敢復窺及賊擾蓬萊福山慮鄉兵弱且未諳紀律賊復來則腹背受敵練精兵千餘設伏山谷絕

賊歸路大創之捐資安置邑郡流亡發常平倉以振人食其利調恩縣捕投田文升者大猾也黨羽數千人散布隣縣前縣噤莫敢發恩壽到任設機擒治之鄰境皆安擒匪宋景詩出沒東昌百計抗禦闔邑無擾調長清未久即有肥城黃崖山之變黃崖山界肥城長清間客民張積中講道所也積中爲殉難臨清州州積功胞弟避匪亂居此因山爲寨盤踞其間左道惑衆省城官幕中人往往因以爲重携眷以居者甚夥人衆愈雜風聲愈熾巡撫閻敬銘廉得其情以書諭之答辭稍慢遂檄恩壽往察之率役登山適礮誤斃恩壽從役一人及傷所乘馬卽馳歸報敬銘以爲叛逆昭著派候補道王成謙督兵進勦恩壽流涕諫曰積中雖迹近謀叛餘皆無罪前日誤斃勇丁耳請分別治之勿玉石俱焚越日圍破寨民不戰而潰積中自焚死而依山以居之官幕死者無算

無辜婦女皆裸身以處恩壽與登州府知府豫山見而憐憫之飭丁星夜赴省購棉衣褲若干人授一襲以蔽身而分途安插且馳書至省使其戚族認領之保全婦孺無數其陰德在人至今猶爲人所稱道者也恩壽旣痛死者以無罪而橫罹凶慘又憾官吏之不能先幾安撫也自是有歸田之志焉子冕癸未科一甲一名進士翰林院修撰

蔡邦治字承恩號茂軒本河南人父永光商於濟遂家焉邦治性慈善有武員高某積累重無以償索者擬乘河督閱射時力擠之高求邦治治卽允爲代償焉他如南鄉趙莊及北關天仙閣外西三里營各置有義塚又修天仙閣凡設義塾施棺木修橋梁助圩工皆贊助之

葉世昌浙江山陰人東河彭口閘官性至孝弱冠父故哀毀盡禮孝事孀母遇事無違服官東河迎養來濟遂僑寄焉公餘之暇跬步不離居



官時上稟慈訓凡催僱漕船監挑工程啟閉閘板接濟運道無不悉心經理挑十字河時尤爲出力上游深器重之南捻犯境時世昌會同地方官固守土圩城賴以完迨匪南竄後隨兵團悉力追勦冒險運糧接濟大軍事竣保獎生平好施興復善堂其創辦也貧民利賴之其官幕家屬貧不能歸無以卒歲者胥籌欸接濟之歲以爲常光緒初歲大稔倡辦義賑會同知州王錫麟設立粥廠全活無算母王氏病侍奉湯藥和淚以進及劇露天籲禱祈以身代卒不瘳世昌哀毀淚盡繼之以血母殮畢卽謂養親事畢將追隨于地下漸見形容枯槁語言失音越數日自知不起向家人言曰予以殉親爲樂志願以償言竟而逝語不及私時年六十歲距親亡僅六日耳後由河督上其事旌如例

以上均據采訪

